



Inatsisartunut ilaasortaq, Kristian Jeremiassen, Inuit Ataqtigiit

Qasigiannuani Aasiannilu talittarfiit pillugit § 37 naapertorlugu apeqquteqaammut 2021-178-imut akissut

21-12-2021
Suliaq nr.: 2021 - 21706
ID. nr. 71056074

Asasara Kristian Jeremiassen

Inatsisartut suleriaasianni § 37 naapertorlugu Qasigiannuani Aasiannilu talittarfiit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Qasigiannuani talittarfiup allineqarnissaa pilersaarutigneqarpa?

Akissut: Qasigiannuani talittarfiup allilernissaanut maannakkut Naalakkersuisut pilersaaruteqanngillat. Qasigiannuani talittarfimmi pisariaqartitat allannussagaluarpata, siunissami tullerriaarinermi ilanngunneqassaaq.

Apeqqut 2: Qasigiannuani talittarfik aserfallannikuuvoq iluarsartuunneqarnissaa pilersaaruteqarfingineqarpa?

Akissut: Qasigiannuani Imapikkut angallatinut talittarfiup nutarterneqarnerata suliarineqarnera 2018-imi aallartippoq, sulilu naammassineqarani. Qeqertarsuup Tunuani talittarfimmi 2022-mi nutarterinissami, Qasigiannuani Imapikkut angallatinut talittarfimmi kiisalu Aalisariutinut talittarfimmi iluarsaanerit annikinnerusumillu aserfallatsaaliisoqassasoq pilersaarutigneqarpoq.

Apeqqut 3: Qasigiannuani talittarfik nakkaammat talittarfimmi ujaqqanik nakkaatitsisoqarnikuuvoq taliffingissallungu ajornarsisumik, ujarassuit piarlugit taliffingineqaqqittalernissaa pilersaarutaava?

Akissut: Qasigiannuani Imapikkut angallatinut talittarfik kingullermik nutarterneqarmat, simissiartaata ilaa ujaqqanik immersorneqarpoq. Taamaakkaluartoq pisariaqartitsineq sinnerlugu ujaqqanik immersorneqarluni. 2022-p ingerlanerani ujaqqat kote -6,5-imut appartinneqassapput/iluarsineqassapput.

Apeqqut 4: Pilersaarutaappat qaqugu piviusunngussava?

Akissut: Apeqqut 3-mut akissut takuuk.

Apeqqut 5: Aasianni talittarfiup iluarsaanneqarnissaa allineqarnissaaluunniit Naalakkersuisut pilersaarutingivaat?

Akissut: Talittarfik nutartissallugu Naalakkersuisut pilersaaruteqarput. Inatsisartut 2021-mi ukiakkut ataatsimiinnerini agguanneqartumi "Kalaallit Nunaanni umiarsualivinni aserfallatsaaliuinikkut kinguaattoorutit pillugit nalunaarussiaq 2021"-imi atuarneqarsinnaasut, Aasianni talittarfimmik aserfallatsaaliinissami kinguaattoorutit 40 mio. koruuninik naleqartutut nalilerneqarpoq. Sanaartornermut tunngatillugu aningaasaliissutit marlunnut avillugit aningaasaleeriaaseq naapertorlugu pilersaarusiornissamut siullermik aningaasanik immikkoortitsisoqassaaq, kingornalu suliariumannittussarsiuussinerup kingorna suliasat suliarineqarnissaannut aningaasanik atugassannngortitsisoqassalluni. Tamanna tunngavigalugu Aasianni talittarfiup nutarterneqarnissaata pilersaarusiorneqarnissaanut, 2022-mi Aningaasanut Inatsimmi 2,5 mio. koruunit immikkoortinneqarput. Pilersaarut 2022-mi aallartinneqassasoq pilersaarutigineqarpoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Mariane Paviassen